

Dåpsliturgi i hovudgudstenesta - til Kyrkjemøtet 2010

I. MOTTAKING TIL DÅP

Dåpsalmen kan ein syngja her, eller før skriftlesinga, før framseiing av forsakinga og trua eller som avslutning på dåpshandlinga. Som alternativ kan det på ein av desse stadene framførast korsong eller solosong.

ℒ I namnet til Faderen og Sonen og Den heilage ande.

Ved dåp av born

Med takk og glede tek kyrkjelyden imot *barnet/borna* som i dag er i Guds hus for å bli døypt/døypte.

Ved dåp av større born, unge eller vaksne

ℒ Med takk og glede tek kyrkjelyden imot *deg/dykk* som i dag er *komen/komne* til Guds hus for å bli *døypt/døypte*.

ℒ Gud har gjeve oss livet og skapt oss til fellesskap med seg. I dåpen frelser Gud oss frå synd og skuld, sameinar oss med Jesus Kristus til eit nytt liv og innlemmar oss i si kristne kyrkje. Etter sitt ord og sin lovnad tek Gud imot oss i dåpen. For så elska Gud verda at han gav Son sin, den einborne, så kvar den som trur på han, ikkje skal gå fortapt, men ha evig liv. Joh 3,16

Ved dåp av born

ℒ Lat oss høyra kor venleg Jesus tek imot borna og opnar Guds rike for dei:

Ved dåp av større born, unge eller vaksne

ℒ Lat oss høyra korleis Jesus opnar Guds rike for oss:

Når både born og eldre born/ungdom/vaksne blir døypte i same gudstenesta, seier ein: Lat oss høyra kor venleg Jesus tek imot borna og opnar Guds rike for oss alle.

ML/ℒ

Dei bar småborn til Jesus for at han skulle røra ved dei, men disiplane viste dei bort. Då Jesus såg det, vart han harm og sa til dei: «Lat småborna koma til meg og hindra dei ikkje! For Guds rike høyrrer slike til. Sanneleg, eg seier dykk: Den som ikkje tek imot Guds rike slik som eit lite barn, skal ikkje koma inn i det.» Så tok han dei inn til seg, la hendene på dei og velsigna dei. Mark 10,13-16

Ved dåp av større born, unge eller vaksne kan følgjande tekst koma i staden

ℒ Apostelen Paulus seier om dåpen:

ML

Det vart openberra kor god vår Gud og Frelsar er, og kor han elsker menneska: Han frelste oss, ikkje fordi vi hadde gjort rettferdige gjerningar, men fordi han er miskunnsam. Han frelste oss ved det badet som gjenföder og fornyar ved Den heilage ande, som han så rikeleg har aust ut over oss ved Jesus Kristus, vår frelsar, så vi ved hans nåde skulle stå rettferdige for Gud og bli arvingar til det evige livet, det som er vår von.

Tit 3,4-7

eller

L Jesus seier at vi blir fødde på ny i dåpen:

ML / L

Det var ein mann som heitte Nikodemus. Han var farisear og sat i Rådet til jødane. Han kom til Jesus om natta og sa: «Rabbi, vi veit at du er ein lærar som er komen frå Gud, for ingen kan gjera dei teikna du gjer, utan at Gud er med han.» Jesus svara og sa til han: «Sanneleg, sanneleg, eg seier deg: Den som ikkje blir fødd på nytt, kan ikkje sjå Guds rike.» Nikodemus seier til han: «Korleis kan ein som er gammal, bli fødd? Ein kan vel ikkje koma inn i morslivet igjen og bli fødd andre gongen?» Jesus svara: «Sanneleg, sanneleg, eg seier deg: Den som ikkje blir fødd av vatn og Ande, kan ikkje koma inn i Guds rike. Joh 3,1-5

Takkebøn

*Her kan ein i dåpsfølgjet, ein medliturg eller liturgen, be ei takkebøn
Ved særskilte høve kan det utarbeidast ei eiga takkebøn. Sjå Rettleiing, s. 000.*

L Lat oss takka og be:

ML: Evige Gud, du har skapt oss i ditt bilete
og i dåpen kallar du oss med namn.
Vi takkar deg for *NN/dei som i dag skal døypast*.
Hald di vernande hand over *henne/han/dei*.
Gjev kjærleik og visdom til alle som har del i
ansvaret og omsorga for *henne/han/dei*.
Gud, høyr vår bøn:
A: Amen.

eller

ML: Miskunnsame Gud,
vi takkar deg for livsens store under
og for *NN//dei som i dag skal døypast*.
Takk for at du i dåpen
gjev oss ein heim i di kyrkje på jorda.

Lat *henne/han/dei få vera* i di omsorg
og gje *henne/han/dei* framtid og von.

Gud, høyr vår bøn:

M: Amen.

Skriftlesning

L Lat oss høyra vår Herre Jesu Kristi ord om dåpen og trua:

Ml / L

Eg har fått all makt i himmelen og på jorda. Gå difor ut og gjer alle folkeslag til disiplar:
Døyp dei til namnet åt Faderen og Sonen og Den heilage ande og lær dei å halda alt det som
eg har bode dykk. Og sjå, eg er med dykk alle dagar så lenge verda står.» Matt 28,18-20

Forsakinga og trua

Ved dåp av born:

L Lat oss saman vedkjennast forsakinga og trua som vi døyper borna våre til:

Ved dåp av eldre born/ungdom/vaksne:

L Vil du saman med denne kyrkjelyden vedkjennast forsakinga og trua, som *du blir*
døypt/ de blir døypte til?

Dåpskandidaten: Ja.

Her, og når det gjeld "ja"-svaret ved dåpshandlinga, kan dåpskandidaten om naudsynt gje stadfestande svar på andre måtar enn med verbalt språk.

Når både born og eldre born/ungdom/vaksne blir døypte i den same gudstenesta, rettar ein spørsmålet først til dei i gruppa eldre born/ungdom/vaksne . Deretter seier ein: Lat oss saman vedkjennast forsakinga og trua, som vi blir døypte til.

A Eg forsakar djevelen og alle hans gjerningar og alt hans vesen.

Eg trur på Gud Fader, den allmektige,
som skapte himmelen og jorda.

Eg trur på Jesus Kristus, Guds einborne Son,
vår Herre, som vart avla ved Den Heilage Ande,
fødd av Maria møy, pint under Pontius Pilatus,
vart krossfest, døydde og vart gravlagd,
fór ned til dødsriket, stod opp frå dei døde tredje dagen,
fór opp til himmelen, sit ved høgre handa åt Gud, den allmektige Fader,
skal kome att derifrå og døma levande og døde.

Eg trur på Den heilage ande, ei heilag, allmenn kyrkje,

eit samfunn av dei heilage, forlating for syndene,
oppstoda av lekamen og evig liv. Amen.

II. DÅPEN

Bøn ved døypefonten

Vatnet blir helt i døypefonten.

ℒ Herre Jesus Kristus, vi takkar deg for dåpens vatn, som ved ditt ord er ei nådekjelde. Her sameinar du oss med deg og gjev oss del i den sigeren du vann ved din død og di oppstode. Vi bed deg: Herre, lat den nye fødselen koma ved din skapande Ande.

eller

Evige Gud, vi takkar deg for at du frelser oss i den heilage dåpen, der du sameinar oss med den krossfeste og oppstadne Jesus Kristus. I trua på dine lovnader bed vi: Send din Ande, så *ho/han/dei* som skal døypast, blir reist/reiste opp til nytt liv i Kristus.

eller

Herre Jesus Kristus, vi takkar deg for dåpens vatn, som ved ditt Ord er ei nådekjelde, der du friar oss frå mørkemaktene og gjev oss del i den sigeren du vann ved din død og di oppstode. Vi bed deg: Herre, lat den nye fødselen koma ved din skapande Ande.

Mellom kvar dåp kan ein syngja eit vers frå ein høveleg salme.

Ved dåp av born:

ℒ Kva heiter barnet?

Den som ber barnet seier fornarnet på barnet.

ℒ Vil de at *NN* skal døypast til namnet åt Faderen og Sonen og Den heilage ande og oppsedast i den kristne forsakinga og trua?

Den som ber barnet, foreldra og fadrane svarar: Ja.

Ved dåp av større born, ungdom eller vaksne:

ℒ Kva heiter du?

Den som skal døypast, svarar sjølv ved å seia fornarnet sitt.

ℒ *NN*, vil du bli døypt til namnet åt Faderen og Sonen og Den heilage ande og leva i den kristne forsakinga og trua?

Den som skal døypast, svarar: Ja.

L Gud vare din utgang og din inngang frå no og til evig tid. Eg teiknar deg med det heilage krossteiknet (✠), til vitnemål om at du skal høyra til den krossfeste og oppstadne Kristus og tru på han.

L NN, etter vår Herre Jesus Kristi ord og bod døyper eg deg til namnet åt Faderen og Sonen og Den heilage ande.

Medan dette blir sagt, auser liturgen med handa rikeleg med vatn over hovudet til den som blir døypt, tre gonger.

Liturgen legg [eventuelt saman med foreldra og fadrane] handa på hovudet til den døypte og seier:

L Den allmechtige Gud har no gjeve deg sin Heilage ande, gjort deg til sitt barn og teke deg inn i sin truande kyrkjelyd. Gud styrkje deg med sin nåde til det evige livet. Fred vere med deg.

Dåpsborna/dåpskandidatane kan her presenterast med orda: Dette er NN, som er døypt inn i Kristi kyrkje og vår kyrkjelyd.

III. LIVET I DÅPEN

Ved bruk av dåpslys tenner ein medliturg eit lys for kvart barn/kvar dåpskandidat. Lysa sløkkjer ein ikkje før gudstenesta er ferdig.

Når alle dåpslysa er tende, seier liturgen:

L Jesus seier: «Eg er lyset i verda. Den som følgjer meg, skal ikkje vandra i mørkret, men ha livsens lys.» Joh 8,12

Kjære kyrkjelyd. Gjennom dåpen set Gud oss inn i si verdsvide kyrkje og gjev oss del i Jesu kall og oppdrag. Lat oss stå saman i vitnemål og teneste, inntil dagen kjem då alt det skapte skal bli forløyst ved vår frelsar, Jesus Kristus.

Ved dåp av born

L Vil foreldre og fadrar reisa seg.

De er vitne om at NN/desse borna er døypt/døypte med den kristne dåpen. Saman med kyrkjelyden vår og heile kyrkja har de fått del i eit heilagt ansvar: Å visa omsorg for henne/han/dei, be for henne/han/dei, læra henne/han/dei sjølv/sjølve å be og hjelpa henne/han/dei til å bruka Guds ord og delta i den heilage nattverden, så ho/han/dei kan leva og veksa i den kristne trua.

Ved dåp av eldre born, ungdom eller vaksne

L Vil (foreldre og) fadrar reisa seg.

De er vitne om at NN/desse er døypt/døypte med den kristne dåpen. Saman med kyrkjelyden vår og heile kyrkja har de fått del i eit heilagt ansvar: Å visa omsorg for henne/han/dei, be for henne/han/dei, og hjelpa henne/han/dei til å bruka Guds ord og delta i den heilage nattverden, så ho/han/dei kan leva og veksa i den kristne trua.

Foreldre og fadrar set seg.

Fadervår

Fadervår blir sagt fram. Dersom det er nattverd i gudstenesta, kan Fadervår falla bort her.

ℒ Lat oss saman be den bønna Jesus har lært oss:

ℳ Vår Far i himmelen!

Lat namnet ditt helgast.

Lat riket ditt koma.

Lat viljen din råda på jorda slik som i himmelen.

Gjev oss i dag vårt daglege brød,

og tilgjev oss vår skuld,

slik vi tilgjev våre skuldnarar.

Og lat oss ikkje koma i freisting,

men frels oss frå det vonde.

For riket er ditt og makta og æra i all æve.

Amen.

eller

ℳ Fader vår, du som er i himmelen!

Lat namnet ditt helgast.

Lat riket ditt koma.

Lat viljen din råda på jorda så som i himmelen.

Gjev oss i dag vårt daglege brød.

Forlat oss vår skuld,

som vi òg forlet våre skuldmenn.

Før oss ikkje ut i freisting,

men frels oss frå det vonde.

For riket er ditt,

og makta og æra i all æve.

Amen.

ℒ

Lova vere Gud, vår Herre Jesu Kristi Far, han som i si store miskunn har født oss på nytt til ei levande von ved Jesu Kristi oppstode frå dei døde! 1 Pet 1,3

Dåpssalme

Det blir sunge ein dåpssalme når det er dåp, her eller på andre stader der det er gjeve høve til det.